

**TEKS UCAPAN  
Y.BHG. PROF. DATUK DR. SHAHRIN BIN SAHIB  
NAIB CANSOLOR  
UNIVERSITI TEKNIKAL MALAYSIA MELAKA**

---

**MAJLIS IFTAR BERSAMA  
TYT TUN DATUK SERI UTAMA MOHD KHALIL BIN YAAKOB  
CANSOLOR UTeM**

**15 Jun 2016 bersamaan 10 Ramadhan 1437H, 6.30 petang  
Masjid Sayyidina Abu Bakar, UTeM**

Bismillahirrahmanirrahim

Assalamualaikum warahmatullahi wabarakatuh

Salam Sejahtera, Salam 1 Malaysia dan Salam Melaka Maju Negeriku Sayang, Negeri Bandar Teknologi Hijau, Melaka 754 tahun, Melaka Maju Fasa 2, Berkat, Tepat, Cepat.

Tuan Yang Terutama Yang Di-Pertua Negeri Melaka, Tun Datuk Seri Utama Mohd Khalil bin Yaakob, Canselor Universiti Teknikal Malaysia Melaka.

1. Sempena petang yang penuh barakah ini, saya mewakili seluruh warga Universiti Teknikal Malaysia Melaka (UTeM) mengucapkan setinggi –tinggi penghargaan di atas kesudian Tuan Yang Terutama Tun Canselor UTeM hadir ke majlis iftar di Masjid Sayyidina Abu Bakar, Universiti Teknikal Malaysia Melaka. Kesudian Tuan Yang Terutama Tun untuk hadir pada majlis ini, sesungguhnya amat bermakna buat semua warga UTeM.
2. Dikesempatan ini, kami seluruh warga Universiti mengucapkan setinggi-tinggi tahniah kepada Tuan Yang Terutama Tun, di atas pelantikan sebagai Yang Di-Pertua Negeri Melaka bagi penggal keempat. Kami seluruh warga Universiti senantiasa, mendoakan Tuan Yang Terutama Tun Canselor dan Toh Puan serta keluarga akan terus dikurniakan kesihatan yang berpanjangan dan

mengharapkan Tuan Yang Terutama Tun Canselor dapat terus memimpin Universiti juga Negeri Melaka ke arah kegemilangan.

Berbau harum bunga cempaka,  
Terkenang si dara kepada teruna,  
Bertuah hidup di bumi Melaka,  
Berkat kepimpinan yang bijaksana.

3. Seterusnya saya memohon keizinan daripada Tuan Yang Terutama Tun untuk berucap kepada hadirin sekalian.

## **A) SALUTASI**

**1. Yang Amat Berhormat Datuk Seri Ir. (Dr.) Haji Idris bin Haji Haron**

Ketua Menteri Melaka dan isteri

**2. Y.Bhg. Datuk Wira Ismail bin Saleh**

Pro Canselor UTeM

**3. Yang Berhormat Datuk Wira Hj. Md Yunos bin Husin**

EXCO Pelajaran, Pengajian Tinggi, Sains dan Teknologi,  
Teknologi Hijau dan Inovasi Negeri Melaka, dan isteri

4. **Yang Berhormat Datuk Haji Naim bin Abu Bakar**  
Setiausaha Kerajaan Negeri Melaka
5. **Yang Berbahagia Tan Sri Dr. Ir. Ahmad Tajuddin Ali**  
Pengerusi Lembaga Pengarah Universiti dan isteri
6. Ahli-Ahli Lembaga Pengarah Universiti dan isteri
7. Dif-Dif Kehormat, Timbalan-Timbalan Naib Canselor,  
Penolong-Penolong Naib Canselor
8. Ketua-Ketua Biro Media dan Rakan Media Negeri Melaka
9. Pegawai-pegawai Kanan Universiti

10. Wakil-wakil Jabatan dan Kesatuan

11. Majlis Perwakilan Pelajar

12. Warga UTeM seterusnya para penerima sumbangan yang diraikan di Majlis Iftar pada hari yang barakah ini.

## **B) PEMBUKA KATA**

1. Alhamdulillah, segala puji bagi Allah SWT, selawat dan salam buat junjungan besar kekasih yang tercinta Nabi Muhammad S.A.W, ahli keluarga dan sahabat baginda. Mari kita merafa'kan rasa kesyukuran ke hadrat Allah S.W.T yang mengizinkan kita untuk sama-sama berbuka puasa di bulan

Ramadhan yang mulia ini bersama-sama Tuan Yang  
Terutama Tun Canselor.

Riang bermain si anak rusa,  
Terpijak duri melompat tinggi,  
Bersyukur kita pada Yang Kuasa,  
Ditemukan puasa sekali lagi.

2. Dikesempatan ini, saya ingin mengucapkan Selamat Menjalani Ibadah Puasa kepada semua Dif-dif kehormat dan tetamu jemputan yang hadir bersama, dan hari ini sudah sepuluh hari kita sama-sama berpuasa, semoga ibadah kita semua diberkati oleh Allah S.W.T. Amin.



3. Sesungguhnya, majlis yang saban tahun ini direncanakan khusus untuk merayakan sambutan Ramadhan Al-Mubarak yang mulia di samping mengeratkan perhubungan silaturahim antara sesama kita sebagai umat Islam, selain memberi peluang kepada warga universiti untuk berhimpun, berbuka bersama seterusnya beribadah secara berjemaah di dalam masjid yang serba suci dan indah ini.

T.Y.T Tun, Hadirin hadirat yang dirahmati sekalian,

4. Pada dasarnya, bulan ramadhan merupakan bulan yang penuh barakah dan maghfirah sehingga diriwayatkan dalam sebuah hadis oleh bukhari yang menyatakan bahawa, pada bulan ini, Allah SWT akan membuka setiap pintu syurga dan

akan membelenggu semua syaitan. Bulan Ramadhan juga telah dikhususkan oleh Allah SWT di antara bulan-bulan lainnya dengan keutamaam yang agung dan diberikan dengan pelbagai keistimewaan, antaranya diturunkan Al-Quran dan di malamnya terdapat lailatul qadar iaitu satu malam yang lebih baik daripada seribu bulan.

5. Berdasarkan kepada kelebihan Ramadhan, maka pada setiap tahun kehadirannya, pelbagai aktiviti dianjurkan di peringkat universiti bagi menghidupkan bulan yang mulia ini. Acara tahunan ini sememangnya telah diteruskan dengan pelbagai aktiviti mengimarah masjid yang diterajui oleh Pusat Islam bersama Fakulti, Pusat dan Pejabat Pentadbiran. Antara program yang dianjurkan adalah penggiliran memasak bubur lambuk, Majlis Iftar Jama'i peringkat Pusat Tanggungjawab,

program tazkirah di masjid, bertadarus, i'tikaf dan Qiamullail terus dilaksanakan bagi mengimarahkan lagi bulan Ramadhan yang mulia ini.

T.Y.T. Tun, hadirin hadirat sekalian,

6. Hakikat Ramadhan sebagai hadiah daripada Maha Pencipta yang menjanjikan kebaikan dan harapan daripada Allah SWT, kepada hamba yang menagih rahmatNya saban tahun. Dalam meningkatkan usaha menggandakan nilai taqwa kepadaNYA, umat Islam diseru untuk tidak lupa menyemai semangat berkorban di jalan Allah, selain menjaga kebajikan dan kepentingan ummah.

7. Justeru itu, bagi mengambil keberkatan bulan mulia ini, maka program pada petang ini juga turut diisikan dengan penyampaian sumbangan kepada **52 orang** penerima yang terdiri daripada pelajar UTeM yang kurang berkemampuan, anak-anak yatim dan miskin daripada Sekolah-Sekolah Rendah JAIM Tun Razak Bukit Katil, Sekolah Kebangsaan Datuk Demang Hussin Bukit Katil dan dari kalangan anak-anak staf UTeM yang kurang berkemampuan. Semoga menerusi sumbangan yang diberikan ini dapat menjadikan Ramadhan ini lebih bermakna seterusnya dapat menyambut Syawal dengan lebih ceria.
8. Bagi pihak Pengurusan Universiti, saya mengucapkan jutaan terima kasih kepada semua pihak yang telah sudi membantu dan menghulurkan sumbangan terutamanya kepada Tabung

Amal Jariah UTeM, PUSPANITA, Badan Kebajikan Staf UTeM (BAKUUTeM).

9. Selain itu, suka saya kongsiikan di sini bahawa majlis pada petang ini juga turut diserikan dengan Penyerahan Sumbangan Zakat dari Bank Islam Malaysia Berhad sebanyak **RM 30,000.00** kepada UTeM bagi membantu dan menyokong perkembangan akademik para pelajar yang kurang berkemampuan di universiti ini. Bagi pihak Universiti, saya mengucapkan setinggi-tinggi penghargaan dan terima kasih kepada pihak Bank Islam Malaysia Berhad di atas sokongan berterusan yang diberikan kepada Universiti ini.

TYT Tun, hadirin hadirat sekalian,

10. Sebelum saya mengakhiri ucapan, saya mengambil kesempatan untuk mengucapkan selamat menjalani ibadah puasa dengan azam dan tekad untuk menjadikannya yang terbaik mungkin. Diharap kita semua dapat meningkatkan lagi amalan pada malam-malam Ramadhan dan seterusnya marilah kita sama-sama memohon doa agar berkat berpuasa yang kita lalui sepanjang Ramadan Al-Mubarak ini akan memantapkan lagi hubungan sesama kita. Insya-allah.

11. Akhir kata, saya merakamkan ucapan tahniah kepada Pusat Islam juga ahli-ahli jawatankuasanya di atas komitmen tinggi menyatu idea, menyempurnakan tugas bagi menzahir upacara seterusnya memastikan majlis terlaksana dengan lancarnya sepertimana yang dirancang awal.

Putih Biru Si Bunga Pekan,  
Cantik Merah Si Bunga Siantan;  
Suruhan Allah segera lakukan,  
Semoga hidup dapat keberkatan;

Tuan Yang Terutama Tun Canselor,

Sekian sahaja ucapan saya.

Akhir kata, sekali lagi saya ingin berterima kasih yang tidak terhingga kepada Tuan Yang Terutama Tun Canselor di atas kesudian hadir ke majlis ini. Sesungguhnya kehadiran Tuan Yang Terutama Tun Canselor begitu besar ertinya buat kami semua.

Saya sudahi ucapan dengan Wabillahitaufik Walhidayah Wassalamualaikum Warahmatullahi Wabarakatuh.